

Xujun xi ma joho xi kits'ínkjihi nda postru Pablo xuta ninku Corinto

B'i ts'ín kikjaniñaha Pablo xuta ninku xi tjín nanki Corinto

¹ An Pablo, an xi kama nku nda postruhu Jesucristo at'aha Ntíaná b'a ts'ín kama mjehe. An ko nda nts'eé Timoteo tísuniñaihi jun xuta ninkuhu Ntíaná xi tintsuḅoo nanki Corinto ko ngatentoo xutaha Ntíaná xi tintsuḅoo nga ngúsuhun ante Akaya.

² Kas'enuu kjuanda ko kjuajyu xi tsjáná Ntia Na'miná ko Nda Ntíaná Jesucristo.

B'i ts'ín y'éña chji Pablo nga Ntíaná kitsjáha nga'yúhun ajihin kjuanima xi j'ajin

³ Kan'etsjoho Ntíaná, kui xi Ntíaha ko Na'mihi Nda Ntíaná Jesucristo. Kui xi Na'miná ko Ntíaná xi ma nimaha ñá ko xi tehente tsjá nga'yúnná.

⁴ Ajihin ngayjee kjuanima xi tíbitjajíáán tsjá nga'yúnná tu xi ko ta ñá ta kama k'uai nga'yúhun raá xuta xi kjuanima tí'ajin. At'aha títsjá nga'yúnná Ntíaná, kui nga kamahaná k'uai nga'yúhun raá xuta.

⁵ Xi nkú ts'ín nkjin kjuanima tíbitjajíin ngat'aha Cristo, b'a ta ts'ín tse nga'yún xi tísakújinni Cristo.

⁶ Tu xi sakú nga'yún nihinuu ko tu xi k'uankihinu, kui nga tíbitjajíhinni kjuanima. Ko nk'ie nga tí'bai nga'yúnni, tí'bai nga'yúnni tu xi sakú

nga'yúhunnuu. Kui nga'yúun xi kuasínkonuu tu xi n'e chúkjuanuu nk'ie nga nībanenuu kjua'un xi tībitjajīn.

⁷ Yai xi nkú ts'ín tjīyanuu. Kui niu xi tíma 'yún tak'uīn. At'ahā yai nga nkuhú bitjajīaán kjua'un ko b'a tā ts'ín sakú nga'yúnná.

⁸ Jun já nts'e, najmi mjenī tsa k'úé'mai kjuanima xi tsitjajīn ante Asia. Tu xī tsehé ni xi kamat'ain nga tā santaha najmi tā tíchúkjuahani niu. “Ja najmi tā kuitjunkihi ná xu'bi”, tsixīn.

⁹ B'a kamanī xi nkú mahā já xi n'ek'ien. Tunga b'ahá kamanī tu xi najmi jīn subā kama 'yún tak'uhunni yjonī. B'a ní kama tu xi Ntīaná kama 'yún tak'uhunni. Kui xi ts'ínkj'áiyahā xutā k'ien.

¹⁰ Ntīaná kits'ínk'ankini nga ja ma kuayá ní ko behe tak'uīn nga tu nku ts'íínk'ankihini. Tu nkú b'ahá ts'íín.

¹¹ Chubantjai sahanī nk'ie nga chubakoo Ntīaná. At'ahā tsa nkjin maha xi kuinchjantjainī nk'ie nga kuinchjako Ntīaná, tā nkjin kamaha xi tsjáha máb'achjīhi Ntīaná ngat'ahā nga nda títs'ínkonī.

B'ī ts'ín kitsúya Pablo mí kjuaha nga tu xujuhún kits'ínkjīhi ra xutā nīnku Corinto

¹² Tsjo manī nk'ie nga chaseī xi nkú ts'ín tintsu bai ko yai nk'ie nga naxu kin'eī ajihinnuu ko ajihīn ngayjee xutā. Najmi ch'a kich'anachaihi. Nk'ie nga b'a kin'eī ajinnuu, kjuandaha ní Ntīaná kitsjániyáni. Najmi xi nkú ts'ín tíñaha xutā kitsjániyáni.

13 Nk'ie nga n'ekjiihi xujun, b'et'aihi ni xi kamankjinnuu nga n'eyo. Nda nkjun tjin tsa kamankjinyjenuu niu.

14 Ja timankjinnuu ichi nd'ai nga nistjin nga k'uaí ngáha Nda Ntíaná Jesu tsjo kamanuu jin xi nkú ta ts'in tsjo kamaní jun.

15 Tu ngat'aha nga ja be nga b'i tíma ajinná, kui nga kama mjehena nga tjun kfínsehenuu tu xi sakúhunuu kjuanda nga jo niyá kfíntsubek'úhunuu.

16 Mjena kai nga tjun k'ua ajinnuu nk'ie nga kfían ante Macedonia ko askahan ta kjuáísehé ngáhanuu nk'ie nga k'óoya ngáhana yo. B'a ts'in kama kuisinkohonú nga ts'inndjuú ngáhana niyána xi tjeheh ante Judea.

17 Kui b'a maha, nk'ie b'a ts'in y'endáhana, ¿a najmi kits'innkjín sisihín ra k'an? ¿A ra b'endána ni xi ts'ian xi nkú ts'in b'énda xuta ni xi ts'in, nga ta kuihi chubo "johon" ko tsa "najmi" tsu?

18 Ntíaná xi be nga najmi ta kuihi chubo "johon" ko "najmi" bixíhín.

19 At'aha ajinnuu an ko Silbano ko Timoteo y'enijmí Jesucristo xi Ntíhi Ntíaná, ko kui xi najmi ta kuihi chubo "johon" ko "najmi" títsu. Kui ní xi "johon" títsuná.

20 At'aha ngayjee ni xi tsuya tíjún Ntíaná nga ts'ín, kui xi bitjusun ajihín Cristo. Kui kjuaha ngat'aha Cristo "b'a kat'e" bixíhinná tu xi sakúhu ra kjuachánka Ntíaná.

21 Ntíaná ts'in nga jun ko jin ndjá binchajián Cristo, kui xi j'ájinná.

²² Kikj'áts'ená nga y'ejñajin Espirituhu animaná. B'a ts'ín yahaná nga n'ekjáihín ni xi tsjáná askahan.

²³ Nginkun Ntíaná b'a tíxinnuu: Nk'ie nga najmi ngjisenuu nanki Corinto, najmi ngjia at'aha najmi mjena tsjanuu kjuaba. Kataya tsa najmi kjuaxi ni xi tíxian.

²⁴ Najmi t'n'e kjuayúhún rj xi nkú ts'ín s'ejinnuu Ntíaná, at'aha ja ndjá tincho. Tu sa ní t'ibisinkoíhi tu xi s'ehenuu kjuatsjo.

2

¹ Kui nga b'a kixihinna nga najmi kfínsenuu, tu xi najmi kjuaba k'uejñájihinnuu.

² At'aha tsa tsjanuu kjuaba, ¿yá xi ts'ín nga k'úé tsjo tsjona? ¿A najmi nku tutuhú jun xi kitsjanuu kjuaba n'oo nga k'úé tsjo tsjona?

³ Kui nga kits'inntúhunu tu xi najmi sakúhuna kjuaba nk'ie nga kuichusehenuu. At'aha jun xi tjíhin nga k'uainú kjuatsjo. Kó behe k'an nga kjuatsjona, kui xi ta kjuatsjonuu.

⁴ At'aha ni xi y'et'ánuu nk'ie nga kits'inntúnuu, b'a ts'ín y'et'á at'aha tu xí bahá tjíhin animána kó tu xí nusihín tjíyaha kui chubo nga santaha íxi kikjínntaná. Najmi kits'inntúnuu tsa tu xi k'úé babahanuu. Kits'inntú nínuu tu xi chahanu nga tu xí tjohóna jun.

B'í ts'ín kitsúya Pablo mí kjuaha nga tjíhin nga n'endyjat'aha rā ndā xi najmi nda kits'ín

⁵ Tsa tjín xi kits'ín nga kik'ie babana, najmi tu nku an xi b'a kits'ínna. Nk'ie nga chasehe ráá, kó ní jun b'a ta kits'innuu. Nk'ie nga chasehe ráá tíxian, b'a tíxian tu xi najmi k'uatihí rā ni xi tíxian.

⁶ Nkjin maha xi tjin ajinnuu xi ja kits'ink'íechji nda xi kits'ink'íé babana. Najmi ta chúkjuaha ra.

⁷ Tu sahá n'endyjat'ohoo ndo ko tjon nga'yuhun tu xi najmi kjuaboo ts'íinkjet'aha ra k'un.

⁸ Kui nga tibankihinuu nga takúchji ngaha ruu ndo nga tjonuu.

⁹ ¿Á kits'inntuhunuu? Kits'inntunuu tu xi skuehena tsa kuinú'yá'énnú.

¹⁰ Xi n'endyjat'ohoo ko ta an ts'inndyjat'aha. Tsa ni xi tjihin nga n'endyjat'a nku ni, ja kits'inndyjat'a. Ba kits'ian ngandanuu nginkun Cristo,

¹¹ tu xi najmi tjin xi nkú ts'in tsungijihin yjoho ndanindoo. At'aha ja yaá xi nkú ts'in ch'on ts'in tjiyaha.

B'i ts'in kitsúya Pablo mí kjuaha nga najmi ts'andayaha ra nk'ie nga ngji nanki Troa

¹² Nk'ie nga tsichuk'ienijmía nanki Troa én nda tsuhu Cristo, ndaha tsa kitsjántena Nda Ntjaná nga k'uenijmía yo,

¹³ tunga najmi kis'eya tsjo tsjohó ra animana, at'aha najmi kisakúna nda nts'eé Tito yo. Kui nga “ja tífhina”, kixihin ra xuta xi tjin yo ko ngjia ante Macedonia.

B'i ts'in kitsúya Pablo nga Ntjaná kits'inchjéhen nga ngjindjuko én nda tsuhu Cristo

¹⁴ Máb'achjiji ra Ntjaná xi ts'in nga tehente n'e nganakoi Cristo Jesu ko nga jin títs'ínchjénni nga tib'éjña chji éhen. Kui éen xi nkú joyaha ni xi sinjne xi tíf'ánta tu má xi tjehén ni.

¹⁵ Jin xi nkú joyaha ntaha chje sinjne xi Cristo ts'ínkjas'ehen Ntjaná, xi tíf'ánta ajihin xi tib'anki ko ajihin xi tindyja.

16 Xi tindyjoo jne ngabaya tíf'ántaha j̄in k̄o kui nt̄o títs'ínk'iehen. Tunga jne kjuatík'uhún tíf'ántaha j̄in xi t̄íb'anki k̄o títs'ínk'íentu t̄ík'uhun nt̄o. ¿Yá xi kamaha ts'j̄in xá xu'bj̄i?

17 J̄in najmi b'a t̄ín'ej̄ xi nkú incha ts'ín xi t̄íbatéña éhen Nt̄ianá t̄u xi sakúhu r̄a ni. Ngayjehe ní animan̄i b'enijm̄i Cristo. B'a n'ej̄ nginkun Nt̄ianá xi kitsjá xáni.

3

B'i ts'ín y'éj̄ña chji Pablo mí nihi xi y'aha ni xi y'énda Nt̄ianá nga t̄juhun k̄o ni tsetse xi y'énda nd'aj̄i

1 Nk'ie nga b'a t̄íbix̄in, ¿a j̄ihín nda ts'ín t̄íchubantjái yjon̄i? ¿A r̄a machjéhenni xi nkúhu xuta xi kj'aí nku xujun xi nda ts'ín kuinchjantjaini t̄u xi jun n'ekjáih̄inni? ¿K̄o a r̄a machjéhenni tsa jun n'endo nku xujun t̄u xi ts'j̄inkjáih̄inni xuta xingisoo?

2 Jun ní xujun xi nda nchantjaini, kui xi y'éj̄najinni Cristo. Be k̄o ts'inya ngayjee xuta,

3 at'aha ya chji chjih̄i nga jun xi xujun xi kits'ínntu Cristo xi j̄in kin'ekjas'ejn. Najmi kin'entú xi nkú ts'ín n'entú xujun. Espirituh̄u ní Nt̄ianá xi t̄j̄ña t̄ík'uun kin'entúk̄oho. K̄o najmi ndjio kis'et'a éen. Aj̄in níná xi xutahá kis'et'a.

4 Cristo títs'ín nga ma k'uj̄in nga b'a kuix̄in nga b'a tj̄in ni xi t̄íbix̄in nginkun Nt̄ianá.

5 Najmi tj̄inni nga'yún kuenta ts'aj̄in subai, tsa b'a kuix̄in nga ts'aj̄in ni xi man̄i n'ej̄. Nt̄ia níná tsj̄ani nga'yún nga n'ej̄ ni xi n'ej̄.

6 Kui xi y'éndani t̄u xi kama n'exájih̄in r̄i ni tsetse xi Nt̄ianá y'énda nga nda ts'j̄ink̄oho xuta xi ts'e. Ni

xi tsetse, najmi nku kjuatéxuma xi tjt'a niu. Ni xi títs'ín ní Espirituhu Ntíaná niu. At'aha ngabaya fikóná kjuatéxuma xi kis'et'oo, tunga Espirituhu Ntíaná ts'ínk'íentu tík'unná bi.

⁷ Kis'ehe kjuachánka xá xi kis'ehe kjuatéxuma xi kis'et'a ndjjo nga santaha xuta Israel xi kis'e nk'ie najmi kama tsase'a Moise tu ngat'aha kuachánka xi tibat'ajín ankjín, ndaha tsa najmi tse kamaha nga tsat'ai. Tsa kjuatéxuma xi kis'ehe xá nga ts'ínnijéhe ra xuta nga tjeheh ngabaya, tsa kui xi b'a nkjún ts'ín kis'ehe kjuachánka,

⁸ ¿a najmi 'yúhún nkjún ts'ín tjín saha kjuachánka ni xi ts'ín Espiritu?

⁹ Tsa kis'ehe kjuachánka xáha kjuatéxuma xi ts'ínnijéhe xuta, ¿a najmi 'yúhún tjín saha kjuachánka xáha én nda tsuhu Ntíaná xi ts'ín nga naxu tíma xuta nginkun Ntíaná?

¹⁰ At'aha kjuachánka xi kis'ejña nk'ie ja kindyja. B'a ts'ín mankjinná nga ch'achubakaa kjuachánka xi 'yún chánka sa xi tjña nd'ai.

¹¹ Tsa kis'ehe kjuachánka ni xi najmi tse kamaha nga tsat'ai, ¿a najmi 'yúhún tjín saha kjuachánka ni xi najmi mahá feya?

¹² At'aha yaj nga b'a tjín ni xi s'ejinni, kui nga najmi tjín ni xi títs'ínkasín'yúhunnj.

¹³ Najmi b'a n'ej xi nkú kits'ín Moise. Kui xi najyun y'é'makoho ankjín tu xi najmi skuehe xuta Israel nd'íhi kjuachánka xu'bo, kjuachánka xi najmi tse kamaha nga tsat'ai.

¹⁴ Tunga kis'e jjuhún kjuankjintak'uhun xuta xu'bo. Kó santaha nd'ai, nk'ie nga incha ts'inya ni xi y'éndakoho Ntíaná nk'ie, b'a ma tsa ta kuihi

najyuun b'é'ma kjuankjintak'uhun. Najmi kje chjuxíhín najyun xi nkuhú Cristo maha kjexín.

¹⁵ Santaha nístjin nd'ai, nk'ie nga incha ts'inya ni xi y'ét'a Moise, kji'ma sa kjuankjink'uhun.

¹⁶ Tunga nk'ie nga s'ejihín xuta Nda Ntíaná, chjuxíhín najyuun.

¹⁷ At'aha nkuhú Nda Ntíaná ko Espiritu, ko má nga tǵña Espirituhu Nda Ntíaná ndaíhi yoho xuta.

¹⁸ Kui b'a maha, ngatenteé najmi ta tǵ'maha ankjían. Xi nkú ní ts'ín ma chjiya sénnístjinná nku chutsín, b'a ts'ín bakuchjáa kjuachánkaha Nda Ntíaná. Tíbichú maá xi nkú tǵn ko xki nístjin 'yún tísakú saná kjuachánkaha. B'a títs'ínkoná Nda Ntíaná xi Espiritu.

4

B'i ts'ín kitsúya Pablo xi nkú ts'ín y'énjmi

¹ Kui nga najmi n'ekjehe ri tak'uin, at'aha Ntíaná tsase nimaní nga kitsjání xá xu'bi.

² Najmi tǵn ni xi kin'eí xi suba maní. Najmi chumi nihi n'e'mái. Najmi kjuamaña tǵn'echjéin ko najmi tǵn'ek'óntjaiyai éhen Ntíaná. Tíbixínya chji chji ní éhen Ntíaná xi naxu tǵn. B'a ts'ín nginkun Ntíaná bakuchjíhi ri nkú k'uin ngayjee xuta xi je tǵntuyá kjuankjintak'uhun.

³ Tsa b'a ma tsa tǵña 'ma sa én nda tsuhu Ntíaná xi tǵb'énjmi, tu ajihín ní xuta xi ndyja tǵña 'ma.

⁴ At'aha ntia xi batéxumaha asunnteí kits'ín jyun kjuankjintak'uhun xuta xi najmi s'ejihín Ntíaná tu xi najmi incha skuehe nd'íu, tsa kamankjihín én nda tsu xi tísuya kjuachánkaha Cristo. At'aha nk'ie nga chasehéé Cristo, Ntíaná yaá.

⁵ Najmi jin túb'enijmíyahani yjoni. Tíb'enijmí ní nga Jesucristo xi Nda Ntíaná maha. Ngandanuu tín'eí ni xi tín'eí at'aha tíñajinni kjuatjoho Jesu.

⁶ At'aha Ntíaná xi kitsjá kjuá nga kuat'ai nd'íu má jyuun, kui xi ta kits'ínkat'aijinná tu xi b'a ts'ín chahaná kjuachánkaha Ntíaná xi tibat'ai ankjin Jesucristo.

B'í ts'ín kitsúya Pablo ni xi j'ajin

⁷ Kik'aini kjuanchiná xu'bi, tunga b'ahá joya jin xi nkú joyaha ndjii ninte xi má nga tíñaya kjuanchinoo. B'a kama tu xi s'eña chjii nga Ntíaná ts'e nga'yún chánkoo ko najmi jin ts'ajin.

⁸ Nkjin tíkjá maha kjuanima xi tíyai, tunga tisakú nyáháni. Kjintahani, tunga najmi tifet'ahá ra k'uin.

⁹ Tjin xi yjanki unkieni, tunga najmi títs'ín nga maháni Ntíaná. Tjin xi 'yún títs'ín'unni, tunga najmi títs'íhin nga tibayai.

¹⁰ Tu má xi tjeén ni nga títbankin, ta kuihi kjuanima tibitajin xi nkúhu xi j'ajin Jesu nga k'ien, tu xi b'a ts'ín ta sakúchjii ajinni nga Jesu xi tíña tít'un.

¹¹ At'aha jin xi tintsuba tít'un, tehente tintsubajin ngabayoo tu ngat'aha Jesu, tu xi b'a ts'ín ta sakúchjii nga tíña tít'un Jesu ajihin yjonintení, yjoninte xi tíhin nga kuayá ndyun nkini.

¹² B'a ts'ín jin xi tibayahani ko jun títintsuba tít'un.

¹³ B'í ts'ín tít'a éhen Ntíaná: “Kis'ejinna, kui nga kinchjhana.” Ko jin b'a ta ts'ín tíntuyáni. Ta s'ejinni, kui nga ta chubahani.

14 At'aha yaá nga Ntíaná xi kits'ínkj'áíya ngáha ra Nda Ntíaná Jesu ngabayoo, kui xi ta ts'íínkj'áíyakóná Jesu kō ts'íínkincháná nginkun.

15 Ngandanuu ngayjee ni xu'bi, tu xi nkjin xuta tsjáha ra máb'achjíhi Ntíaná tu ngat'aha kjuanda xi tíincha sakúhu. B'a ts'ín tís'ejña chjihi kjuachánkaha Ntíaná.

16 Kui nga najmi n'ekjehe ri tak'uin. Ndaha tsa tifenki nga'yúhun yjoninteni, tunga xki nistjihín tísakú nga'yúhun animani.

17 Ichí kō kutjuhú f'a kjuanimá xi tíyaá nd'ai, tunga kuihí niu xi ts'ín nga nku kjuachánka xi tíjña sín kō xi nda ts'ati sa sakúná.

18 Najmi ni xi tíyaá n'esihín. Ni xi najmi tíya nínáá kjintaháná. At'aha ni xi ma chji tu tífahá, tunga ni xi najmi ma chji s'ejña sín.

5

B'i ts'ín tsakúya Pablo nk'ie nga yjoninte tsetse ch'aá

1 At'aha yjonintená, kui xi nkú joyaha nku ni'ya najyunte xi tintsúbayaá ei asunntej. Kō nk'ie nga kuatsún ni'ya najyuntee, yaá nga ndjiojmi ján ch'aá nku ni'ya xi 'yún nda xi tsjáná Ntíaná, xi najmi xuta kits'ínnda kō xi najmi mahá batsun.

2 Un tímaná nk'ie nga tintsubaá ei. Mangimjená n'ekjáihín ni'ya xi k'uainá ndjiojmi ján. Kui xi nkú joyaha tsa najyun tsetse kamaná nga ndyjaá.

3 B'a ts'ín ndaha tsa chjúxiná ni'ya najyunte xi kich'aá nd'ai, najmi kisti chaná.

4 At'aha nk'ie nga kich'a saá ni'ya najyunte xu'bi xi yjonintená, xí f'áitse'uhúnná nga najmi

tə chúkjuahaná. Nk'ie nga najmi mjená ch'aá yjoninte xi kich'aá nd'ai, najmi tsuhu ra tsa najmi mjená yjoninte. Ni xi mje nínáá, nga ch'aá yjoninte tsetse tɔ xi b'a ts'ín ni xi tíjña tík'uun k'úéjñaha ngajohɔ ni xi maha 'me.

⁵ Kui ngat'oɔ kits'índahaná Ntíaná kɔ kitsjáná Espirituhu, tɔ xi chá kixihiná nga n'ekjáíhín ni xi tsjáná askahan.

⁶ Kui nga tehente ndjá tinchahaná kɔ yaá nk'ie nga tintsɔbajin saá yjonintee, tintsɔba t'axíhín Nda Ntíaná.

⁷ Tinímaá tɔ ngat'aha xi s'ejinná, najmi ngat'aha ni xi tíyaá.

⁸ Ndjá tincháá kɔ mangimjená nga tɔ sahá k'úéjña t'axíaán yjoninte xi kich'aá nd'ai nga kuintsɔbakaá Nda Ntíaná.

⁹ Kui nga tɔ nkú mjehéná nga n'eé ni xi tsjohɔ Nda Ntíaná, tsa ni xi tintsɔbajin saá yjoninte xu'bi kɔ tsa ja kin'ekj'áíyaá.

¹⁰ At'aha ngatenteé tjíhin nga kuicháá nginkun Cristo nga kuasehe ni xi kin'eé, tɔ xi n'ekjáíhin raá ni xi kanéná nga nkúnkáá, ni xi kin'eé nga tintsɔbajían yjonintená ei asunntej, tsa nda kɔ tsa najmi nda kin'eé.

B'i ts'ín tsakúya Pablo ni xi kits'ín Cristo ngandaná

¹¹ Kui b'a maha, at'aha yankjúin Nda Ntíaná, kui nga tí'miya sisihín rí xutə nga tə s'ejihín. Ntíaná be xi nkú ts'ín tjíyani kɔ mjena nga kɔ tə jun xi nda animanuu choɔ xi nkú ts'ín tjíyani.

¹² Najmi tə tíchubantjáí ngáhani yjoni, tsa tɔ xi jun n'ekjáíhinni. Tɔ sa ní tí'baintej nga jun tsjo

tímanuu jín. B'a ts'ín kama n'ek'óyaha ruu xi chuba tsjohó maha xi nkú ts'ín tíya, xi najmi nusihín xi nkú ts'ín tjíyaha.

¹³ At'aha tsa jín xi lukui tsu xuta, luku ní at'aha xaha Ntíaná t'n'eí. Tunga ngandanuu, kui nga n'esisihinni ni xi n'eí.

¹⁴ At'aha kjuatjoho Cristo tijnajinni ko tibatéxumani. Behe tak'uin nga nkuhú maha xi k'ien ngandaha ngatentee xuta, ko kui nga k'iehen ngatentee xuta.

¹⁵ K'ien Cristo ngandaha ngatentee xuta, tu xi xi tjiintu tik'uhun ja najmi ta kuenta ts'e suba k'úentu tik'uhun. K'úentu ní tu xi ts'íihin ni xi tsjoho Cristo. Kui xi k'ien ngandaha xuta ko j'áíya gáha ra.

¹⁶ Kui nga najmi ta chasehe ri xuta xi nkú ts'ín basehe xinkjín xuta. Ndaha tsa nk'ie b'a ta ts'ín kichaseihi Cristo, tunga nd'ai najmi b'a ta ts'ín chasehe ri.

¹⁷ Kui nga xi nkuhú kamako Cristo, kui xi xuta tsetse gáha. Ja j'a ni chóo. Ja j'ai ni xi tsetse.

¹⁸ Ngayjee ni xu'bi Ntíaná nibáha ra. Cristo kits'ínchjén nga tsichuk'un gáha raá Ntíaná. Ko jín kitsjá xáni nga k'úénijmíihi xuta nga ja ma bichúk'un gáha ra.

¹⁹ Tshu ra nií nga Ntíaná kits'ínchjén Cristo nga kama kuichúk'un gáha ra xuta xi tjin ngayjee asuntee, nga najmi ts'íinsihín jéhe. Jín kitsjáni nga k'úénijmíi nga ja ma bichúk'un gáha raá Ntíaná.

²⁰ Jín xi y'éxáni Cristo nga kuixínyai éhen. Kui nga xi nkúhu tsa Ntíaná tinchjakonuu nk'ie nga tichubakoihi. Ngajoho Cristo b'a tí'míihi nga t'endakoo Ntíaná.

21 Cristo najmi kis'ehe ngatitsun, tunga tsasehé ra Ntíaná xi nkúhu tsa ngatitsun kis'ehe. Ngandaná b'a kits'ihin Ntíaná, tu xi tu ngat'aha Cristo naxu kamahaná nginkun.

6

1 Kui nga t́binchihí ri jin xi t́n'exát'aihí Ntíaná nga najmi tu tohón manuu kjuandaha Ntíaná.

2 At'aha b'í t́tsu éhen Ntíaná:

Nda chubá tsasinñjúhu,

tsásinkoho nístjin nga kits'ink'ankia xuta.

B'a t́xinnuu nga nd'ai ja kich'aá chubaha Ntíaná.

Ja tinchajían nístjin nga t́ts'ínk'anki xuta.

B'í ts'ín kitsúya Pablo ni xi inchaj'ajin tu ngat'aha xáha

3 Ndaha nku najmi t́n'endyjajihín tsa tu xi ndyjaha. B'a t́n'eí tu xi najmi ch'on ts'ín chubayanéhe xá xi t́n'eí.

4 Tu sa ní ajihín ngayjee ni xi n'eí bakúchji nga Ntíaná t́n'exát'aihí. T́n'e chúkjuai nkjin t́kjá kjua'un ko kjuanima xi t́yai ko kjuaba xi t́sakúni.

5 T́s'eni, nubayá t́n'ekjas'enni, ko tíma ñjakúneni xuta nga t́fi kontrani. Xá ndjá t́n'eí, najmi t́suntuféi, ko kjintía t́yai.

6 Naxu t́bankínkoi yjoni ko mankjinni ni xi najmi chubá mankjiná. T́jinni kjuatsenta ko n'etjólhi xuta. T́jñajinni Espirituhu Ntíaná ko t́jñajinni kjuatjo xi nda.

7 Én xi b'a t́jn t́ichubai ko nga'yúhun Ntíaná t́jñajinni. Naxu tinchaj nginkun Ntíaná, kui xi n'echjéin nga binsinkoi yjoni.

⁸ Tjín nga yankjúnni kò tjín nga najmi yankjúnni. Tjín nga nda ts'ín chubantjáíni kò tjín nga ch'on ts'ín chubantjáíni. Já tsank'á n'e maní, ndaha tsa én xi naxu tichubai.

⁹ Xuta xi najmi ch'a xi behe n'e maní, ndaha tsa ya sisinni. Xuta xi ja tí'me n'e maní, ndaha tsa tintsuba tík'un sai. Tí'baini kjuanima, tunga najmi tábaya ní.

¹⁰ Tintsubai xi nkúhu tsa kjuaba tjinni, tunga tehentehé tjín tsjo tsjoni. Tintsubai xi nkúhu xuta xi x'an, tunga nkjihín maha xi ja kin'e nchinái. Tintsubai xi nkúhu xi najmi chumi nihi xi tjíhín, tunga tjíhínni ni.

¹¹ Jun xuta Corinto, jin ja kuachubako kixi kixihí. Tí'miyahí ni xi tíñajin animani.

¹² Mje níni jun, tunga jun najmi b'a ts'ín mjenuu jin.

¹³ Kui nga tínchjakohonu xi nkúhu tsa ntína jun. B'a ta n'oo xi nkú nga tín'ei. B'a ta ts'ín takúni ni xi tíñajin animanu.

B'i ts'ín kitsúya Pablo nga najmi tjíhin nga nkuhú ts'ín mako yjoho xi s'ejihín Ntíaná kò xi najmi s'ejihín

¹⁴ Najmi tu nkuhú n'e makoo yjonuu xuta xi najmi s'ejihín Ntíaná nga ts'ínkonuu ni xi ts'e. At'aha, ¿a nkuhú mako xinkjín ni xi jee kò ni xi ch'onk'uun? ¿A mahá má ndzjeen kò má jyuun b'atjijihín xinkjín?

¹⁵ ¿A mahá nda nchjako Cristo ndanindoo? ¿Mí ni xi nkuhú incha y'a xi s'ejihín Ntíaná kò xi najmi s'ejihín?

16 ¿A kamahá ninkuḥu Ntjaná ts'ínkjáíhḥin ntja xi ntsja xuta ts'ínnda? At'aha ñá xi ninkuḥu Ntjaná xi tǵña tǵ'uuḥ. B'ǵ kitsú Ntjaná nk'ie:

Kúátejǵajihḥin kǵ kjuatsú'bajihḥin xuta xu'bo.

An xi kama Ntjahá kǵ kui xi kama xutana.

17 Kui nga b'ǵ tǵ kitsú saha Ntjaná:

Tǵtǵujǵúhḥin xuto, tankín t'axíún.

Najmi tǵ n'ekǵo ni xi si nginkán,

kǵ b'ǵ ts'ín an nda ts'ín ts'ínkjáínnuu.

18 An xi kama Na'minnuu kǵ jun xi kamo ntína.

B'ǵ tǵtsu Ntjaná xi tǵhḥin nga'yún.

7

1 Kui b'ǵ maha, jun xi tjona, ñá ts'añáá ni xi kitsúya tǵtǵun Ntjaná nga tsjáha xuta xi ts'e. Kui nga n'e jehená yjoná nginkun Ntjaná nga n'e t'axíaán ngayjee ni xi ts'ínsi yjonintená kǵ anǵmaná. Katuma je kikjián nginkun Ntjaná nk'ie nga chǵankjáán.

B'ǵ ts'ín kitsúya Pablo nga tsjo tímaha ni xi nda ts'ín j'ajin xuta ninku Corinto

2 Tǵenntenǵ ajin anǵmanuu. Ndaha nku najmi ch'on kin'eǵhǵ. Ndaha nku najmi kin'e'uihḥin. Ndaha nku najmi kich'anachǵhǵ.

3 Najmi b'ǵ tǵinnuu tsa tǵ xi s'entahanuu. At'aha xi nkú nga ja kixinnuu, jun xi tintsuǵajiun anǵmanǵ, tǵ xi nkuhú ch'ahaná xinkjá ndaha tsa kuǵntsubaá kǵ ndaha tsa kuayáá.

4 Ma k'an nchjakǵ kixǵ kixinnuu kǵ tsjo mana jun. Ajihḥin ngayjee kǵuǵanǵma xi tǵyai, 'yún tǵsakúna nga'yún kǵ tǵtǵejhinna kǵuǵtsjo.

⁵ Nk'ie nga jái ante Macedonia, ndahachí namji kin'ekj'áiyai. Tu sa ní kjuasti kisakúni tu má xi tjehén ni. Incha kikjánko xinkjín xuta xi tjíntundáini ko tsinkjunyai.

⁶ Tunga Ntjaná xi tsjá nga'yúhun xuta xi tjihin kjuaba, kui xi kitsjá nga'yúnni nga kits'ín nibáseni Tito.

⁷ Najmi tu nku nga kiyai Tito nga kisakú nga'yúnni. Ta kisakú nga'yún níni nga kitsúyani xi nkú ts'ín kisakú nga'yúhun ajinnuu. Kitsúyani nga 'yún mjenuu cha ngáhani ko nga nusin tjíntuyánuu ko nga kjintahánuu an. Kui niu xi kits'ín nga 'yún kis'e sana kjuatsjo.

⁸ Ndaha tsa kits'ínk'íé babanuu xujun xi kits'ínkjínuu, tunga najmi ta kjintahana nd'ai. Kjuaxi nga kis'entana nga tjuhun, at'aha kamankjinna nga kik'ie babanuu kutju ngat'aha xujun xi kits'ínkjínuu.

⁹ Tunga nd'ai tsjo tímana, najmi tu ngat'aha nga kik'ie babanuu, tu ngat'aha ní nga kui kjuaboo kits'ín nga tsankinchj'a ngáha ruu animánuu. Kik'ie babanuu xi nkú ts'ín sasihin Ntjaná. Kui nga najmi chumi ni ch'onk'uhun xi kin'ehe ri.

¹⁰ At'aha kjuaba xi nibáha ra Ntjaná ts'ín nga bankichj'aha raá animaná. Kui niu xi ts'ín nga b'ankiá. Kui nga najmi tjín xi nkú ts'ín un kamaha tak'aán nga kui kjuaboo nibanehená. B'a tíxian at'aha kjuaba xi tsjáná asunntee, kui xi ts'ínk'ienná.

¹¹ Chasoo ni xi kits'ínkonuu kjuaba xi kits'ín nibánuu Ntjaná. Tu xí kj'áihí ts'ín kis'eyanuu. Nku tutuhú nga b'a kamanuu, kiyo nga najmi chumi nihi tjenna. Santaha kichubantjáínú. Kama stinuu ko tsinkjun ngat'aha ni xi kama kai. Kama

mjenūu nga chanú kō kik'ohō xi nkú ts'ín tjehe_n ra nda xi ch'on kits'íun. Nk'ie nga b'í nkjún kama, tsakuchjúu nga najmi kō jun y'ahanūu ni ch'on tjín xi kamoō.

¹² Kui nga ndaha tsa kits'inkjihinūu xujun xu'bo, najmi b'a kits'ian tu ngat'aha xi ch'on kits'ín kō ta ndaha ngat'aha xi ch'on kin'ehe. B'a ní kits'ian tu xi chaha nginkun Ntíaná nga kjintahānuu jin.

¹³ Ni xi kamoō kitsjá nga'yúnni.

Kō najmi tu nku ni xu'bi xi kitsjá nga'yúnni. Ta tu xí tsjo ní kamani nga kiyai nga tu xí tsjohó tjihin Titō at'aha kisakú nga'yúhūn nga y'ejñajinnūu.

¹⁴ Ja ní b'a kixihin Titō nga tsjo mana jun, kō b'a tjín ni xi kixian. Najmi tíya tsank'ána. Xi nkú ts'ín kjuaxi ngayjee ni xi tsixíihin, b'a ta ts'ín kjuaxi ni xi kik'ihin Titō nga tsjo maní jun.

¹⁵ Titō 'yún tjo ts'atihí jun nd'ai, at'aha f'áítsjehen xi nkú ts'ín ngatentoō kinu'yá'óhōon kō xi nkú ts'ín nda kin'ekjóhōon kō kiyankjún.

¹⁶ Tsjo mana, at'aha be nga ma ma 'yún tak'unnuu.

8

B'í ts'ín kitsúya Pablo nga tjihin nga kamakúhu tōon chje xuta ninku xi tjín ante Judea

¹ Kō nd'ai, já nts'e, mjeni nga choo xi nkú ts'ín Ntíaná títsjáha kjuandaha xuta ninku xi tjín ante Macedonia.

² Ndaha tsa ndjá kjuanima xi tíncha satéjin nga tíchjut'ayák'un, tunga tsjohó tjíntuhū. Kō ndaha tsa x'an nkjún, tunga incha kits'ínsuhún tōon chje xi nkú joyaha tsa nchiná.

³ Be nga ngayjehe k'un incha kitsjá. Xi nkú tjin kamaha kitsjá, kō santaha y'ésun saha nga kitsjá.

⁴ 'Yún tsankini nga kjuainteihini nga sakút'aha kjuatsjo xu'bi tu xi kuasinkoho xuta xi s'ejihin Ntíaná xi tjinu ante Judea.

⁵ Kō najmi tu nku ni xi tsixin nga ts'in incha kits'in. At'aha títjun títjun incha kitsjáha yjoho nga incha tsjénki Ntíaná, kō ta incha kitsjáha yjoho nga kamakonini xi nkú ts'in mjehe Ntíaná.

⁶ Kui nga tsinchihini ri Tito nga ts'inndjuúhu xá nda xi kik'atuts'ihin ra ajinnuu, nga k'uénda chje nda xi t'in'esún.

⁷ 'Yún nda n'o ngayjee ni xi n'o. S'ejinnuu Ntíaná. Chubanijmíyahanu ni xi ts'e Ntíaná. Mankjinnuu éhen Ntíaná. Tjindanuu yjonuu nga kuiskoo xuta xi k'ái. Tjonuu jin. Kui nga xi nkú ts'in tehente nda n'ehenu ni xi n'o, b'a ta ts'in nd'ai nda n'esún ngó toon chje xu'bi.

⁸ Najmi b'a tíxian tsa tjin kjuayún nga b'a ta n'oo. Ni xi mje nína, nga choo ni nda xi tjincha ts'in já nts'eé xi k'oo tu xi b'a ta ts'in kuakúchjihinu nga ta ngayjee animanuu tinibáha kjuatjonuu.

⁹ Ja yo kjuanda xi y'a Nda Ntíaná Jesucristo nga j'ai, nga ndaha tsa tu xi nk'ahá tjen tunga ts'asje x'ahán yjoho ngandanuu, tu xi ajihin kjuax'an xi kis'ehe ra kisakúhunuu kjuanchiná.

¹⁰ Tsjanuu nku kjuatéxuma at'aha kjennuu niyá nga choo kui ni. Nk'ie nú jun tjun kama mjenuu nga n'esún toon chje kō jun tjun kin'esún.

¹¹ Kui nga n'endjuúhunu nd'ai ni xi kich'atuts'ihinruu. Xi nkú ts'in ngayjehe k'un kama mjenuu nga b'a n'oo, b'a ts'in ngayjehe k'un xi nkú ts'in tísakúnuu tjon niu nd'ai.

12 At'aha tsa ngayjee animaná tí'baá, kō tsa tí'baá xi nkú tjín tísakúná, Ntíaná ts'ínkjáihín ni xi tí'baá. Najmi tibaníná ni xi najmi tjínná.

13 Najmi b'a tíxian tsa jun tjíhin nga kuitjájiiun kjuanima kō tū sa kj'áihí ngá xi nda ts'ín k'úéentu. Ni xi nda ní tjín nga nkuhú nga nda ts'ín kuintsuboo.

14 Nd'ai tjínnuu kō kama k'uohō ni xi ndyjat'aha xuta xu'bo, kō kj'ai nístjin ngáha kui s'ehe ni xi ndyjat'anuu. B'a ts'ín tā kama tsjánuu. Nku chubahá s'enuu.

15 Kuitjusun xi nkú ts'ín tjít'a éhen Ntíaná: “Najmi ts'anki kamaha xi 'yún tse j'áya kō najmi kindyjat'aha xi chuba j'áya.”

B'i ts'ín kitsúya Pablo yá xi ngjuaiko toon chje

16 Tsjaha máb'achjíhi Ntíaná at'aha kitsjáha Tito nga tā ngjuántaha rá yjohō jun xi nkú tā ts'ín kjintahana an.

17 Kits'ínj'ō nga ts'íintjusun ni xi an tsankihí kō ngayjehe k'un tífisenuu. Ja b'a títsu koyaha animaha.

18 Kō tā tín'ekjikoí Tito nda nts'eé xi nda ts'ín nchjayanēhe ngayjee xuta nínku, at'aha kixi b'énijmí én nda tsuhú Ntíaná ndo.

19 Kō najmi tū nku nda ts'ín chubanijmíyaha ndo. Tā y'ét'a xáha xuta nínku nga kui xi ngjuaikoní nga kuankínkoí toon chje. B'i nda tín'ei kō b'a ts'ín tín'etsjohō rá Nda Ntíaná kō tób'ejña chjii nga mjeni kuisínkoí xuta.

20 Najmi mjeni tsa tjín xi kuintchjayaneni ngat'aha xi nkú ts'ín tíncha títjuihín toon chje chánka xi tímakú.

²¹ Kui nga nda nda tíchasehe rí xi nkú ts'ín kixí títbankínkoí ni xi tít'ei nginkun Nda Ntíaná kó ta nginkun xuta.

²² Kó ta tít'ekjíkoí já xu'bí kj'aí nda nts'eé xi ja nkjin niyá tsakúchjini nga nda fiko xáha. 'Yún mjehe kuasinkonuu, at'aha 'yún sasíhin jun.

²³ Kó máha Tito, ta kui xáha xi tít's'ín xi nkúhu an, nga ta títbasinkonuu. Kó já nts'eé xingisoo xi tjenko, xuta ninku kits'ínkjihí. Kui jóo ta ts'ín nga yankjún Cristo tu ngat'aha xá xi ts'ín.

²⁴ Kui b'a maha, nda ts'ín n'ekjáihin ruu jóo tu xi skuéhe ngayjee xuta ninku xi nkú tjin kjuatjonuu kó mí kjuaha nga tsjo mahani jun.

9

B'i ts'ín y'enda Pablo xi nkú ts'ín s'ekú toon chje xi kamakú

¹ Ta ndaha najmi machjéhen tsa kuet'ánuu nga toon chje tímasúhun xuta xi Ntíaná kík'áts'ehe xi tjíntu ante Judea.

² At'aha be nga nda animanuu. Xí tsjohó tímana nk'ie nga kixinyaha kui nií xuta xi tjin ante Macedonia. B'a kixihin nga jun xi tintsuboo ante Akaya nk'ie nú kjin tintsuba ndahanu nga k'uo toon. Nk'ie nga kint'é xuta Macedonia kui nií, nkjin xi ta kixinchá tsjohó nga ta ts'ínsun toon.

³ Tungá tít's'ínkjísehénuu já nts'eé xu'bí tu xi najmi tu a éhén kamaha ni xi kixihin jóo nk'ie nga b'a kixian nga tsjo mana jun ngat'aha ni xi tít'o. Tífi jóo yó tu xi kuasinkohonuu nga k'úékú toon xi k'uo. B'a ts'ín kamaha ni xi kixihin.

4 At'aha tsa kuankínkoj yō k'ua xuta Macedonia, ko tsa as'aihi incha skuē nga najmi kjee tjíkúnūu toon chje, kama subani. At'aha ja tu xí tíma 'yún k'un ní ni xi tsixíún. Ko jun ta kama subanūu.

5 Kui nga b'a kixihinna nga tu sahá b'a xihin já nts'eé nga tjun ngjuaisehenuu tu xi k'uéndakohonūu toon chje xi tsixinya tíjūn nga k'uo. B'a ts'ian tu xi b'a ts'in s'ejña ndaha nku toon chje xi ngayjee animā tí'bai, najmi tu kjuā'yúhún tí'bai.

6 N'ekj'áítsjon ni xu'bj. Xi chuba ni xi b'éntje, kui xi chuba chan kjesíntjen, ko xi tse ni xi b'éntje, kui xi tse chan kjesíntjen.

7 Nga nkúnkú tjon xi nkú tjín nibáha ra animanūu. Najmi tu un katuma k'un ni xi k'uo nga k'uo, ko ta ndaha najmi tu kjuā'yún 'boo. At'aha Ntíaná tjoho xi tsjo tjíhin nga tsjá ni xi tsjá.

8 Tjíhin nga'yún Ntíaná nga tu ni xí tsjáhanūu ngayje tíkjá kjuanda, tu xi tu nkjéhé nihi najmi chumi nihi xi ndyjat'ahanūu ko b'a ts'in kama n'ehenu ngayjee ni xi nda.

9 Xi nkú ts'in tjít'a éhen Ntíaná nga b'i títsu:

Kits'índzjo ni xi tjíhin,

xuta x'an kitsjáha.

Tu nkjéhé ni nga naxu ts'in.

10 Ntíaná xi tsjá xujmá xi s'entje ko tsjá nichine, kui xi tse ni xi tsjánūu tu xi ta kama kujsinkohonūu xuta. Ts'ín nga 'yún tse s'enuu ko nga xúbáya ni nda xi t'n'o.

11 Nkjin tíkjá kjuanchiná s'enuu tu xi ngayjehe k'un kama kujsinkoo xuta. Ko máha ni xi n'e nibákonj, kui xi ts'ín nga já nts'eé tsjáha máb'achjíhi Ntíaná.

¹² Nk'ie nga t́bisinkoo xuta xi Nt́ianá kikj'áts'e, tí'bohó ni xi machjéhen kó kui nga nkjin xi títsjáha rá máb'achj́hi Nt́ianá.

¹³ Nk'ie nga skue ni xi t́n'o, incha ts'íintsjohó Nt́ianá, at'aha t́nu'yá'óhóon én nda tsuhú Cristo kó at'aha ngayje animanuu t́bisinkoo, kó najmi t́ kui, kj'ái sa xuta.

¹⁴ Kó nk'ie nga incha kuinchjako Nt́ianá, kuinchjantjainuu at'aha tjohó jun. Incha skue nga t́ xí tsehé kjuandaha Nt́ianá kitsjánuu.

¹⁵ ¡Máb'achj́hi rá Nt́ianá ngat'aha ni xi tsjáná! ¡Najmi t́jinná én xi kuixínyahaná xi nkú ts'ín chánga ni xi t́ kitsjáháná!

10

B'i ts'ín y'éjña chji Pablo nga tsjo maha xá xi Nt́ianá kitsjáha

¹ Nginkun Cristo xi tjohó kó xi nda ts'ínkó xuta, an Pablo t́bankinuu nku ni. B'a t́xian at'aha t́jín xi b'a tsu nga najmi nda nkjún t́ján nk'ie nga tíjñajinnuu kó nga ndjá nchja nk'ie nga kjin tíjñanuu.

² T́bankinuu nga najmi t́ n'o nga ndjá kuinchjakonuu nk'ie nga kuichusenuu. At'aha t́jinnkuhu k'an nga ndjá kuinchjaka xi b'a maha nga b'a ts'ín tintsubai xi nkú ts'ín nkaha xuta asunntej.

³ Kjuaxi kjáihin nga asunntej tintsubai, tunga najmi b'ahá ts'ín t́bixkjain xi nkú ts'ín kján xuta asunntej.

⁴ At'aha najmi asunntej ts'e ni xi t́n'echjéin nga t́bixkjain. Nga'yúhun ní Nt́ianá t́n'echjéin,

nga'yún xi maha ts'ínkje nga'yúhún já kontra kò basinne'yún én xi nchja xi fi kontrani.

5 Chjuxubaj ngayjee nga'yún ch'onk'un xi b'échjaha xuta nga skué Ntíaná, kò n'e nganaihi ngayjee ni ch'onk'un xi ts'ínkjink'un xuta. B'a n'ei tu xi kuint'é'éhen ra Cristo.

6 Tjándani yjoni nga n'ek'íechji xi nkú ts'ín tjeheh ra xi najmi kuint'é'één, tunga títjuhún tjihin nga jun tjun kuinú'yá'én sisinnú.

7 Jun xi chase sunnk'ohoo ni xi tjín. Tsa tjín xi behe k'un nga Cristo yjanki, kui xi ta kats'ín kuenta nga kò ta jin yjanki Cristo xi nkúhu kui.

8 Ndaha tsa nk'a b'asjé yjona ngat'aha xáni, tunga najmi subahá mana nga b'a ts'ian, at'aha Nda Ntíaná kitsjá xáni. Kui xi mjehe nga n'ei nga saájin so ni xi ts'e Ntíaná, najmi mjehe tsa n'ei nga ndyjoo.

9 Najmi mjena tsa xujun xi títs'inkjínuu kuinchánkjínuu.

10 At'aha tjín xi b'a tsu nga ndjá rú kò kjan rú én xi b'et'ánuu, tunga nk'ie rú nga tíjñajinnuu najmi ndjá rú b'asjé yjona kò rú najmi chumi ni chjhi ra én xi nchja.

11 Tunga xi b'a títsuu kats'ín kuenta nga ni xi b'et'a xujun nga kjin tintsubaj, kui niu xi n'ei nk'ie nga kuintsubajihin.

12 Tjín xi nda ts'ín nchjanijmíyaha yjoho. Tunga máha jin, najmi ma k'uin tsa b'a bixín nga jin xi nkú joyaha já xu'bo, kò tsa ta ñja n'e makoi yjoni jóo. Ta ndaha najmi be ni xi incha ts'ín jóo, at'aha ta kuihi xinkjín base chubayakoho ra yjoho kò incha base chubayaha xinkjín.

13 Tunga máha jin, nku tutuhú ngat'aha xá xi kik'aini jin, kui niu xi chánka n'esjekohoni yjoni. Najmi bitjatíhi chjintí xi y'éjñaha Ntíaná xáni, xá xi tsichuk'únnuu santaha ko jun.

14 Tsa najmi tsichuk'úhín kai, ja ra tíbitjatíhi má tjeheñ ra xáni. Tunga kjuaxihí kjáihín nga jin tjun tsichukoihi én nda tsuhu Cristo.

15 Najmi tífa ts'ajin xá xi incha kits'ín kj'ai xutaha, tsa tu xi nk'a n'esjeheñi yjoni. Tu sa ní tíchuyáihí nga xi nkú ts'ín 'yún s'ejin sanuu Ntíaná, b'a ts'ín kama tse sa ajinnuu xáni,

16 tu xi kama kuankínk'íénijmíhíni én nda tsuhu Cristo ajihín xuta xi kjin tjintu sa nga jun. At'aha najmi mjeni tsa n'e ts'ajin xá xi kits'ín kj'ai, tsa tu xi b'a ts'ín n'e chánkahañi yjoni.

17 Tsa tjín xi mjehe nk'a k'uasje yjoho, ngat'aha ní ni xi kits'ínkoho Ntíaná, kui ní ngat'aha nga nk'a kat'asjehe yjoho.

18 At'aha najmi xi nda ts'ín nchjayane suba yjoho, tsa kui xi nda n'ekjáihín. Xi nda ní ts'ín nchjayanehe Ntíaná, kui ní xi nda n'ekjáihín.

11

B'i ts'ín kitsúya Pablo ni xi ts'ín já postru ts'ank'óo

1 N'echúkjuo íhí tsa kuinchajnu kuinchjat'a. Johon, n'e chúkjuanú.

2 At'aha nginkun Ntíaná nibáha ra xi nkú ts'ín tükunuu. At'aha jun xi nkú joyaha takjín xi an kits'inkjas'en nga kuixanku nku nda, kui xi Cristo. Ko mjena ts'inkjas'ehén jun xi nkú joyaha nku takjín xunkú.

3 Tunga tsankjunná tsa b'a kamat'on xi nkú nga kamat'ain Eva nk'ie nga kjuamañaha ye ts'anachakohō ra, tsa b'a ts'inndyjajihin kjuankjintak'unnū ko najmi ta ngayjehe k'un ko je tsjénkihi ruu Cristo.

4 B'a tíxian at'aha nda ts'in n'ekjóhōon já xi kj'ai én b'énijmínū, kui xi najmi éhen Jesu xi jin y'enijmí. Jun xi ja kin'ekjóhōon Espirituhu Ntíaná, ta n'ekjóhōon kj'ai xi najmi Espirituhu Ntíaná. Jun xi ja kin'ekjóhōon én nda tsuhu Cristo, ta tín'ekjóhōon kj'ai én.

5 Najmi ichí mana yjonā nginkun já postru i xi tjín.

6 Ndaha tsa najmi 'yún mana nchja nga nchja, tunga bená ni xi ts'e Ntíaná. Ja ní tu xí tsakuchjíhí rí nga yai ni xi ts'e Ntíaná.

7 Nk'ie nga y'enijmínū én nda tsuhu Ntíaná, najmi j'achjínū. B'a ts'in ts'asjé nimañjuañaha yjonā ko jun ts'asjénk'anū. ¿A ngatitsuhún kits'ian nga b'a kits'innū?

8 Tsakj'a toon xi kitsjana kj'ai ninku tu xi kama ts'ihinna xana ajinnū.

9 Nk'ie nga tsátejñajinnū ko nga kindyjat'ana tsa mí nihi, najmi kits'instinnū. At'aha ni xi kindyjat'ána, já nts'eé xi nibáha ante Macedonia kitsjana. Najmi y'enénū yjonā ko tu nkú najmi k'uenéhénū yjonā.

10 Kjuaxi nga éhen Cristo tjíñajinna ko kjuaxi nga ngúshun ante Akaya najmi kama s'ech'ónna kjuatsjo xi tjínna nk'ie nga najmi f'achjá nga b'enijmía én nda tsuhu Cristo.

11 ¿Áhan? ¿A at'aha najmi tjona jun? Ntíaná be nga tjona jun.

12 Tu nkú kfinndjukoná ni xi títs'ian. B'a ts'ín najmi tsjantéhe ra xi tíncha bangisjai niyáha nga xi nkúhu jin ts'ín ma yjoho, tsa tu xi b'a ts'ín nk'a k'uasjehe yjoho.

13 At'aha já postru tsank'áhá jái. Xá xi incha ts'ín b'anachakoho ra xuta. Já postruhu Cristo ts'ín ma maña yjoho.

14 Najmi ni tsetse ni xi tíncha ts'ín jóo. At'aha ndanindo nku ntítsjehe Ntíaná ts'ín ma maña yjoho.

15 Kui nga najmi ma nkjúhunná nga já xi ts'ínxát'aha ra ndanindo xuta xi ts'ín ni xi nda incha ts'ín ma maña yjoho. Tunga kuichúhú nistjin nga ts'ínkjáihin chjíhi ni xi tíncha ts'ín.

B'i ts'ín kitsúya Pablo nga nkjin kjuanima j'ajin ngat'aha xáha

16 B'ahá ta tíxin ngáhanuu. Ndaha nku najmi b'a tu katsú nga nchajnu nchjat'a. Tunga tsa jun xi b'a kuixiún, tu sa ní tjennténú nga kuinchakonuu xi nkúhu nku xi nchajnu nchjat'a tu xi chánka k'uasjéhena ichi yjona.

17 Nga ma k'an chánka k'uasjé yjona, najmi Nda Ntíaná tinibáha ra nga b'a tíxian. An ní suba chuba tínchjaná.

18 Xihí nkjihín maha xi chánka incha maha yjoho ngat'aha xi nkú ts'ín, kui nga ko ta an chánka kamahana yjona.

19 At'aha jun xi nkjink'un, kui nga nda ts'ín n'ekjáihin ruu xi nchajnu nchjat'a.

20 Santaha 'bainto nga xuta musu n'e manuu, nga ch'anachanu, nga chju'ánuu ni xi ts'ajun, ko 'baintohō xi nk'a b'asjenuu yjohō kō xi incha m'ojinnuu.

21 Jin bi najmi b'a ts'ín ndjá kin'ekoihi xi nkúhu já xu'bo. Xí tíma subahána nga b'a tíxian. Tsa tjín xi ma k'un nga tsjo maha ngat'a ts'e yáha kui, ta kama k'an b'a ta ts'ian, ndaha tsa tínchajnu tínchjat'a nga b'a tíxian.

22 ¿A já hebreo niu? Ta nda hebreoná. ¿A ntje Israel tjeheñ ra jóo? Ta ntje Israel tjeheña. ¿A ntjehe Abraham jóo? Ta ntjehe Abraham an.

23 ¿A kui xi tíncha ts'inxát'aha Cristo? An xi 'yún títs'inxát'a saha, ndaha tsa b'a ts'ín tínchja xi nkú ts'ín nchja xi nchajnu nchjat'a. An xi 'yún kits'inxá sa nga kui jóo. 'Yún nkjin niyá kin'ekjína nubayá. 'Yún nkjin niyá kis'ena. Kō nkjin niyá ja ma tsayaná kai.

24 Un niyá kingjána já k'aku xi tjiñin xuta judio kan tj'ion ñju niyá. Xi nkú ts'ín tjiñaha, b'a kits'ín.

25 Jan niyá tsich'onýana. Nku niyá y'éjtjtsena ndjio jóo. Jan niyá ngijintí yábarku xi tjiya. Nku ñstjen kō nku ñstjin kitsjenb'ásan ntáchak'uun.

26 'Yún ñkjún jatsúu'ba tu má xi tjeheñ ni. Nk'ie nga kits'ian niyá kitsankjan ni xi kamat'an ajin ntáje. Kitsankjan tsa já ndyjéé satéjian. Kitsankjan tsa nkú incha ts'ínna xi ta ntje judio tjeheñ ra xi nkúhu an kō ta xuta xi najmi ntje judio tjeheñ ra. Kitsankjan tsa nkú kamat'an ajin nantio kō ngijñóo kō ajin ntáchak'uun, kō ta ajihin xi já nts'eé ts'ín ma maña yjohō.

27 Tu xí nchjáha ni xi kits'ian kō tse kjuanima

kikie. Tu xí nkjihín n̄iyá najmi kikjafe. Kama bjona, kama xintána, kō tu xí nkjihín n̄iyá tsátejña kjintía nga najmi chumi nihi xi kisakúna nga kjíne. J'ajian nch'án kō kindyjat'ána najyun.

²⁸ Ndaha tsa b'a t́imat'an, t̄unga t̄a kis'entahána ngayjee n̄inku xk̄i n̄istjin.

²⁹ Tsa t̄jín xi saté ch'in, kō t̄a an ma unna. Tsa t̄jín xi n'endyjajih̄in ni xi ts'e Nt̄ianá, t̄u xí kjahán mana.

³⁰ Tsa ni xi machjéhen r̄a nga chánka k'uasjéhena yjona, chánka ní k'uasjé yjona nga najmi t̄jínna nga'yún xi ts'an.

³¹ Nt̄iaha kō Na'mih̄i Nd̄a Nt̄ianá Jesucristo xi t̄jín nga n'etsjoh̄o t̄u nkjéhé ni. Kui xi be nga najmi t̄ib'anacha.

³² Nk'ie nga tsátejña nanki Damasco, kitsjá kjua nd̄a t̄itjun xi ts'ínxát'aha nd̄a rej Areta nga chúnnta ankjuaha nankiu t̄u xi chjúbénijéhena.

³³ T̄unga nkuhú n̄isin kichjujenkohona xjó xi t̄í'a t̄jindaih̄i nankiu. Ankjuank'a xi t̄jent'a xjóh̄o nankiu kin'esjehena. B'a ts'ín tsankaha r̄a jóo.

12

B'i ts'ín kitsúya Pablo nga nga'yúhun Cristo t̄jñaha

¹ Ndaha tsa najmi chumi ni chj̄ih̄i r̄a nga chánka k'uasjé yjona, t̄unga t̄jín ni nga b'a ts'ian. Kui nga kuinchjahana ni xi kikie kō xi tsakúchjina Nd̄a Nt̄ianá.

² Be nku nd̄a xi s'ejih̄in Cristo xi kichjubéjih̄in s̄én nga ngji nk'a ján xi ma jahan. Ja t̄jinh̄in te ñju nú nga b'a kamoō. Tsa ngji yjonintehe kō tsa najmi ngji, najmi be. Nt̄ianá xi be.

³ Be nga nda xu'bo ngji ndjiojmi jan. Tsa ngji yjonintehe ko tsa najmi ngji, najmi be. Ntiana xi be.

⁴ Yo kint'e en xi najmi tjin xi nku ts'in chubahaná, xi tijná nkjún nga k'únyaha xuta.

⁵ Kama chánka k'uasjé yjona ngat'aha ni xi kamaha nda xu'bo, tunga najmi chuba chánkahá k'uasjé yjona. Chánka ní k'uasjé yjona ngat'aha nga najmi an ts'an nga'yún xi tjinna.

⁶ Tunga tsa chánka k'uasjé yjona, najmi tinchajnu tinchjat'a tsa b'a ts'ian, at'aha b'a tjin ni xi kuinchja. Tunga najmi b'ahá ts'ian tu xi najmi ch'a b'a kuitsuhu tsa nihi xi nkjún ts'ian ko nihi xi nkjún ts'in nchja, tsa as'ai najmi b'a tjin nu.

⁷ Tu xi najmi chánka kamahana yjona ngat'aha ni chánka xi kis'ejña chjina, Ntiana kits'in nibánena nku kju'a'un xi nku joyaha tsa na'yá kisasíns'ehen yjonintena. Tshu ra nga nda musuhu ndanindoo ts'in'unna tu xi najmi chánka kamahana yjona.

⁸ Jan nyá tsankihí Nda Ntiana nga kjéxinna kju'a'un,

⁹ tunga b'ahá kitsúna: “Kjuandanahá xi machjéhin, at'aha ajihin xi najmi tjihin nga'yún s'ejña chji nga'yúnna.” Kui nga tsjo mahana nga chánka tímahana yjona ngat'aha nga najmi tjinna nga'yún. B'a ts'in s'ejña chjhi nga'yúhun Cristo ajinna.

¹⁰ At'aha mjena Cristo, kui nga tsjo mahana nga najmi tjinna nga'yún, ko nga ch'on ts'in nchjayanena xuta, ko nga ndyjat'ána ni xi machjénna, ko nga tsjennkí unkiena xuta, ko nga sakúna kjuanimá. At'aha nk'ie nga najmi tjinna nga'yún, nk'iehé nga tjinna nga'yún.

B'i ts'in y'éjña chji Pabło nga kjintaha ra xuta ninku Corinto

11 Kuanchja xi nkúhu nku nda xi nchjajnu nchjat'a, tunga juhún kuan'e kjuayúnnú nga b'a kuats'ian. Kutsa juhún xi tjíhin nga nda k'úinnú. At'aha najmi 'yún nk'a tjenna já xi chuba já postruhú maha yjoho ko chuba ihí maha yjoho nga an, ndaha tsa b'a xian nga najmi chumi ni chjhi ra an.

12 Kjit'a kjit'a kama kjuankjún ko kjuachánka ko ni xi tsakúchji nga'yúhun Ntíaná ajinnuu. Kui ni xi tsakúchji nga nda postruná.

13 ¿Mí nihi xi kisakúhu xuta ninku xingisoó xi najmi kisakúnnu? Nku tutuhú nga najmi kik'ienénuu yjona nk'ie nga tsátejñajinnuu, xi nkú kits'inka xuta ninku xingisoó. ¡N'e'yún tak'unnú nga b'a ch'on kits'inkonuu!

14 Ja tjíndana yjona nga kfínsennuu niyá xi ma jahan ko ta ndaha nd'ai najmi k'uenénuu yjona. At'aha najmi ni xi tjínnuu títangisja. Jun ní xi nusinna. At'aha najmi xi tí'mi ntí tjíhin nga kj'uatjo toon xi ts'íinchjén xi cháha. Xi tí'mi ní xi chá, kui xi tjíhin nga kj'uatjo toon xi ts'íinchjén ntíhi ndyjun nkiní.

15 Kui nga tsjo tjíhinna nga ts'inchjén ngayjee ni xi tjínna ko santaha yjona katjejnú tsa ma tu ngat'aha ngandanuu. Nk'ie nga 'yún mjena jun, ¿á 'yún ichí tín'e mjehenú?

16 N'ekjáihín nga najmi y'enénuu yjona, ndaha tsa b'a tsu xuta nga nda mañaná xi ts'anachannuu.

17 Já xi kits'inkjísennuu, ¿a kits'inkjía jóo tu xi kj'éahannuu ni xi tjínnuu?

18 Tsankihí Tító nga ngjisenúu kó tã kits'inkjíkã kj'ái ndã nts'eé. ¿A rá kikje'áhánúu Tító ní xí tjínúu? ¿A najmi tú nkuhú tjíntuyá anímaní an kó Tító? ¿A najmi tã kuihí ní xí tín'ej?

19 Kutsa b'ahá ts'ín tín'enkjínk'un, nga túbisinkoi yjoní nga b'í túbixín. Cristo ts'ení kó nginkun Ntíaná tichubaj. Jun xi tjoní. Ngayjee ní xí tín'ej, b'a tín'ej tú xí sahánu nginkun Ntíaná.

20 At'ahã kjintahana tsa nk'ie nga kujichusenúu, skue nga najmi b'a n'e tintsuboo xí nkú ts'ín mjena nga skuenúu. Kó jun kutsa najmi चाहánú xí nkú ts'ín mjenuu nga chanú. Kjintahana tsa najmi nkuhú kich'o xinkíu, tsa tjín kjuaxintak'un, tsa tjín kjuakjan, tsa tjín xí nk'a tíf'ahã xinkjín, tsa tjín én tsank'á, tsa tjín xí tínchjayane xinkjín, tsa tjín xí ngak'un, kó tsa tjín xí túb'éntje kjuachán.

21 Kjintahana tsa nk'ie nga kujichuse ngáhanúu, sakúna kjuasuba nginkun Ntíaná. Kutsa tjíhín ní nga kjíntat'á nkjin xí tjín ajinnu xí kits'ín ngatit-sun kó najmi kjee fikj'áhã rá anímahã ngat'ahã ní xí incha kits'ín, xí ts'ín ní xí chuntí nginkun Ntíaná, xí chubã fantukohó xinkjín, xí tú ts'ínkjas'ehén rá yohó tú mí nihí ní xí nchjahã anímahã.

13

B'í ts'ín kitsúya Pablo xí nkú ts'ínkó xutã Corinto nga kujichúshe

¹ Niyá xí ma jahan nga kfínsenuu xu'bj. S'enda tú mí kjuahá ní tsa jo kó tsa jan já testiyu kúinchjã ní xí be.

² Ja b'a kixinnúu nk'ie nga ngjisenúu niyá xí ma johó kó nd'ai nga najmi tíjñajinnúu b'ahá tã tíxin

ngáhanuu. Nk'ie nga kfinse ngáhanuu, najmi kama nimaná xi kits'in ngatitsun nk'ie kō tā ndaha tsa kj'ai sa.

³ B'a ts'ian at'aha t́binchisj́o ni xi kuakúchji nga éhen Cristo t́inchja. Tunga ajinnuuhú bakúchji nga'yúhun. Najmi t́jñajinnuu Cristo xi nkúhu nku xi najmi t́jihin nga'yún.

⁴ Ndaha tsa najmi tsakúchji nga'yúhun nk'ie nga k'ient'á kruu, tunga nd'ai nga'yúhun Ntíaná t́jña t́k'uhun. Kō jin b'a tā ts'in najmi t́jinni nga'yún, xi nkúhu Cristo nk'ie nga k'ien. Tunga ngandanuu nga'yúhun Ntíaná tintsuba t́k'unkehoni Cristo.

⁵ Jun chase suboho yjonuu tsa s'ejinnuu Jesucristo. ¿A najmi mankjihinnuu nga Jesucristo t́jñajinnuu? N'enkjínk'un sisin ní ngáhanu. Nk'ie nga ja kuan'enkjínk'un sisin, kutsa najmi t́jñajihinnuu Cristo.

⁶ Nk'ie nga ja kuan'enkjínk'un sisin, t́kuyáha nga s'ejña chji nga éhen Cristo t́chubai.

⁷ T́binchihí Ntíaná nga ndahachí najmi ch'on n'ehenu. Najmi b'a t́bixín tsa tū xi chaha nga t́n'etjusun sisin xáni. B'a ní t́bixín tū xi nda n'ehenu, ndaha tsa b'a kuitsu xuta nga najmi nda t́n'ej xáni.

⁸ At'aha najmi ma bankín kontraihi ni xi b'a t́jin xi bakúya Jesucristo. Jin ní t́n'exát'aihi kui niu.

⁹ Tsjo maní nk'ie nga b'a tsu xuta nga najmi t́jinni nga'yún kō nk'ie nga jun xi t́jinnuu nga'yún xi tsjá Ntíaná. Tū nku t́binchihí rí Ntíaná nga kuichúmo xi nkú ts'in mjehe Ntíaná.

¹⁰ Kui kjuaha nga b'i ts'in t́b'et'áhanuu ni xu'bi nk'ie nga najmi t́jñajinnuu, tū xi nk'ie

nga kuichusehenuu najmi tjihin nga 'yún ndjá ts'inkonuu. At'ahá Nda Ntíaná kitsjá xána xi má nga ts'ian nga saájiun xi s'ejinná. Najmi kitsjá xána tsa ts'inkjenuu.

B'i ts'in kits'inkje Pablo xujuin

¹¹ Kō ni xi fekuhu xi xinnuu, já nts'e, kas'enuu kjuatsjo. Tinchísjo xi nkú ts'in naxu kamo nginkun Ntíaná. Tjen nga'yúhuun xinkiu. Nkuhú kas'eyanuu. Jyu tintsuakoo xinkiu. Kō k'úejñajinnuu Ntíaná ma xi tsjáná kjuatjo kō kjuajyu.

¹² B'i ngján súnioho xinkiu.

¹³ Títs'inkjinuu kjuasuniña ngayjee xuta xi kikj'áts'e Ntíaná xi tjin ei.

¹⁴ Ngatento kō kas'enuu kjuandaha Nda Ntíaná Jesucristo kō kjuatjoho Ntíaná kō kat'ejñajinnuu Espirituhu Ntíaná.

Éhen Ntíaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

e05183c2-7c34-5cdd-8c78-15ea51bd8cbb